

**Tawaran 'Enam Tambah Tiga' Pembangkang Sebenarnya Telah Dan Sedang Dilaksana BN - MB Pahang**  
**Bernama**  
**11 Disember, 2012**

KUANTAN, 11 Dis (Bernama) -- Menteri Besar Datuk Seri Adnan Yaakob menegaskan tawaran 'enam tambah tiga' oleh pembangkang kepada rakyat Pahang sekiranya pembangkang menang pada pilihan raya umum akan datang bukan sesuatu yang baharu, malahan kesemua tawaran itu telah dan sedang dilaksanakan oleh kerajaan Barisan Nasional (BN).

Beliau berkata tiga tawaran mega peringkat pusat dan enam peringkat negeri itu adalah satu taktik pembangkang dalam menarik perhatian dan mengelirukan rakyat.

"Antara enam tawaran jika mereka (pakatan pembangkang) dapat memerintah Pahang nanti adalah menyediakan lot-lot rumah untuk rakyat dan menyelesaikan permohonan tanah yang sekian lama dipohon.

"Perkara tersebut telahpun dan sedang dibuat oleh kerajaan Barisan Nasional sekarang yang sentiasa prihatin tentang kebajikan rakyat," katanya pada sesi penggulungan pada persidangan Dewan Undangan Negeri pada Selasa.

Tawaran tersebut diumumkan oleh Ketua Pembangkang Datuk Seri Anwar Ibrahim pada Himpunan Kebangkitan Rakyat Pahang di Dataran Rakyat, Kompleks PAS Pahang di Kerdau, Temerloh, baru-baru ini.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=716609>